

太平寰宇記

第四十五册



太平寰宇記卷之一百八十四

四夷十三

西戎五

高附

大秦

小人

烏弋山離

條支

安息

小安息

大夏

大月氏

小月氏

党項

白蘭

白狗

高附國

高附國後漢時通焉在大月氏西南亦大國也其俗

似天竺而弱易服善賈販內富於財所屬無常天

竺罽賓安息三國強即得之弱則失之後漢史云先未嘗屬

月氏前漢書以為五翎侯數悞矣

大秦國

大秦國一名犁鞞居言切一云前漢時犁鞞國又名拂林國後漢

時始通焉其國在西海之西亦云海西國其王理

安都城宮室柱稅皆以水精琉璃為之貴臣十二

共理國事其王無常揀賢者立之國有災異及風

雨不時即共廢之有鳥似鷲其毛綠色常在王邊

倚枕上坐每進食有毒其鳥則鳴戶十萬餘南臨

大海城東面有一大門高二十丈飾以黃金凡有
大門三重第二門之樓懸一大秤以金圓十二枚
屬于衡端以候日之十二時爲一金人其大如人
立于側每至一時金圓輒落鏗然有聲金人卽應
聲引唱以記日時毫釐無失其殿以瑟瑟爲柱黃
金爲地象牙爲門扇香木爲樑棟無瓦以白石屑
塗屋上如白玉焉其地平正人居星布東西南北
各數千里有四百餘城小國役屬者數十西有大
海海西有遲散城王城有官曹簿領而文字習胡
人皆髦頭而衣文繡亦有白蓋小車旌旗之屬及

十里一亭三十里一置一如中土州邑地多師子
遮害行旅若不百餘人持兵器輒爲所食其國嘗
欲通使于漢塗經大海商客往來皆齎三歲糧是
以至者稀桓帝延熹初大秦王安敦遣使自日南
徼外獻象牙犀角瑋瑁始乃一通焉其所表貢並
無珍異疑傳者過焉至晉武帝太康中其王遣使
貢獻或云其國西有弱水流沙近西王母所居處
幾于日所入也隋煬帝欲通之竟不能致貞觀十
七年其王波多力遣使獻赤頗黎綠頗黎石綠金
精等物後臣屬大食國焉乾封二年遣使貢底也

伽開元七年因吐火羅大首領貢師子二羚羊二

遣僧來朝貢外國圖云從闕臣北有國亦名大秦

云拂菻在若國西隔山數千里亦曰大秦其人顏

色紅白男子悉著素衣婦人皆服朱錦好飲酒尚

乾餅多工巧善織絡或有倂在諸國守死不飲酒尚

風琉璃妙者天下莫比王城方八十里四面境土

各數千里勝兵約有百萬常與大食相禦西枕西

海南枕南海北接可薩突厥西海中市客主同

和我往則彼去彼來則我歸賣者陳之于前買者

酬之於後皆以其直置諸物旁待領直然後收物

名曰鬼市又聞西有女國感水而生又云摩隣國

在勃薩羅國西南渡大磧行二千里至其國其人

身黑俗獷少米麥無草木馬食乾魚人食鷓鴣

莽卽波斯棗也瘴癘特甚諸國陸行之所經也胡

則一種法有諸般有大食法有大秦法有尋尋法

其尋尋蒸報于諸夷狄中甚當食不語其大食

法者以子弟親戚而作判典縱有微過不至相累

不食猪狗驢馬等肉不拜父母國王之尊不信鬼

太平寰宇記卷之百八十四

神祀天而已其俗每七日一假不買賣不出納飲
酒謔浪終日其大秦善醫目及痢或未病先見或
開腦出蟲

四至

從條支西渡海曲近萬里約去長安四萬里東南
與波斯接地方萬里

土俗物產

其人長大平正類中國故謂之大秦或云國本中

土人也有駭雞犀

抱朴子云通天犀有一白理如
縵者以盛米置羣雞中雞欲啄

米輒驚去故南
人名為駭雞犀

合會諸香煎其汁以為蘇合土多

金銀奇寶夜光璧明月珠琥珀琉璃神龜白馬朱

鬣瑋瑁玄熊赤螭辟毒鼠大貝車渠

廣雅云車渠渠石次玉

瑁廣雅云瑁瑁石次玉贗出西海有養者似狗多力獷惡

古獷

切北附庸小邑有羊羔自然生于土中候其欲萌

築墻院之恐獸所食也其臍與地連割之絕則死

擊物驚之乃驚鳴遂絕逐水草無羣又有木難出

翅鳥口中結沫所成碧色珠也土人珍之

曹子建詩珊瑚

閒木有幻人能額上為炎燼手中作江湖舉足而

珠玉自墮開口則旛毘亂出

前漢武帝時遣使至安息安息獻犁軒幻

人二皆蹙眉峭鼻亂髮鬚鬚長四尺五寸毘音人志切有織成細布言用水

羊毛名曰海西布作氍毹毹毹罽帳之屬其色又

鮮于海東諸國所作也常利得中國縑素解以爲
胡綾紺紋數與安息諸國交市于海中西南漲海
中可七八百里行到珊瑚洲水底有盤石珊瑚出
其上大秦人常乘大舶載鐵網令水工沒水先入
視之可下網乃下初生白漸漸似苗坼甲歷一歲
許出網目閒變作黃色支條交錯高極三四尺大
者圍尺餘三年色乃赤好復沒視之知可採便以
鐵鈔發其根乃以索繫網使人于船上絞車舉出
還國理截恣意所作若失時不舉便蠹敗

小人國

小人國在大秦國之南軀纔三尺其耕稼之時懼鶴
所食大秦每衛助之小人竭其珍以酬報

烏弋山離國

烏弋山離國漢時通焉去長安萬二千二百里不屬
都護戶口至多亦大國也東北至都護理所六十
日行東與罽賓接北與撲桃西與犁軒條支接
犁軒
即大秦也行可百餘日乃至條支按魏書其國一名排
持也

條支國

條支國漢時通焉人眾甚多往往有小君長安息役

屬之以爲外國

安息以條支爲外國如言蕃國也

以地絕遠漢使

稀至自玉門陽關出南道歷鄯善而南行至烏弋山離南道極矣轉北而東復馬行六十餘日至安息按後漢書和帝永元中班超掾甘英使大秦抵條支臨大海欲渡而安息西界船人謂英曰海水廣闊往來逢善風三月乃得渡若遇遲風閒亦有三歲者又曰海中善使人思鄉漢使若不顧父母妻子者則可往矣英聞而止西海到玉門陽關四萬里

四至

去陽關二萬二千一百里在蔥嶺之西城在山上
周迴四十餘里臨西海海水曲環其南及東北三
面路絕惟西北通陸道

土俗物產

土地暑濕田宜稻出犂牛孔雀有大鳥卵如甕汲水

瓶其草木畜產五穀果菜食飲宮室市列錢貨兵

器金珠之屬皆與罽賓同而獸有桃拔獅子澤牛

桃拔一名符拔似鹿長尾一角者或為天鹿兩角

者或為辟邪獅子似大蟲正黃有頰形尾端茸毛
大如斗爾雅所謂狻猊也狻音俊其錢獨文為人
貌音倪拔步各切形亦頰旁毛也

頭幕為騎馬

安息國

安息國漢時通焉王理蕃兜城

蕃音盤

其屬大小數百

城地方數千里最大國也地臨媯水

今為烏商賈

商賈

車船行旁國書革旁行為書契

今西方胡書皆橫行不直下也革為

皮之不柔者也

武帝始遣使至安息其王令騎迎于東界

木鹿城號為小安息去其王都又數千里行比至

過數十城人戶相屬因發使隨漢使以大鳥卵及

犁靽眩人獻至後漢章帝時理和犢城遣使獻獅

子符拔

符拔形似鱗而無角

西域記云自安息西行三千四

百里至阿蠻國從阿蠻西行三千六百里至斯賓

國從斯賓南行渡河又西至于羅國九百六十里
安息西界極矣自此南乘海乃通大秦其土多海
西珍奇異物焉至後周天和二年安息王理蔚搜
城遣使獻貢至隋大業五年安息又朝貢隋書云
王姓昭武與康國同族都在那密水南城有五重
環流水宮殿皆爲平頭王坐金駝座高七八尺

四至

去長安一萬一千六百里在蔥嶺之西大宛西可
數千里不屬都護北與康居東與烏弋山離西與
條支接焉

太平寰宇記 卷之一百八十四
土俗物產

土地風氣人俗物類與康國烏弋罽賓同以銀爲錢文獨爲王面幕爲夫人匿王死輒更鑄有大馬爵頸及膺身蹄似橐駝色蒼舉頭高八九尺張翅丈餘食大麥

小安息國

小安息國一名渴汗國治渴汗城後漢小安息國也西域傳云安息東界木鹿城號爲小安息西域地理記云昔康國王之先兄弟十人分居王國其一卽渴汗國也城可十餘里有戶二萬 志城山

滴水

大夏國

大夏國漢時通焉在大宛西南二千餘里媯水南其俗土著有城室與大宛同俗去漢一萬二千里居漢西南本無大君長城邑往往置小長甚弱畏戰善賈市及大月氏西徙攻敗之皆臣畜共稟漢使者同受節度按大夏人多可萬餘有市販賈諸物東南接身毒國皆屬大月氏

大月氏國

大月氏國

月氏音肉支

漢時通焉理藍氏城一名薄羅城

在大宛西可二千里居媯水之側不屬都護戶

十萬其國本行國也隨畜遷徙與匈奴同控弦十

餘萬故恃強輕匈奴本居燉煌祁連間祁連山在今張掖郡

之西至冒頓單于攻破月氏而老上單于殺月氏

以其頭為飲器乃遠去過大宛西擊大夏而臣之

都媯水北為王庭其餘小眾不能去者保南山羌

號小月氏于大夏分其國五部翎侯後百餘歲貴

霜翎侯攻滅四翎侯翎音自立為王因號貴霜王

又滅濮達屬賓悉有其國復滅天竺月氏自此之

後最為富盛至後魏代北與蠕蠕接數為所侵遂

西徙都薄羅城去弗敵沙二千一百里

弗敵沙在藍氏城東

後其王寄多羅勇武遂興師越大山南侵北天竺自乾陀羅以北五國盡役屬之國人乘四輪車或四牛六牛八牛輓之在車大小而已後魏書云太武時其國人商販至京師自云能鑄石爲五色琉璃於是採礦山中于京師鑄之既成光澤美于西方來者乃詔爲行殿可容百人光色映澈觀者驚以爲神明自此所作琉璃遂賤人不復珍之

四至

其南則大夏西接安息四十九日行北則康居去

長安一萬一千六百里

土俗物產

土俗氣候物類風俗錢貨與安息同出一封橐駝
玄中記云瑪瑙出大月氏又有牛名爲日及今日
割其肉明日瘡愈又宋膺異物志云月氏國有羊
尾重十斤割之供食尋生如故

小月氏國

小月氏國理富樓沙城其王本大月氏王寄多羅子
也寄多羅爲蠕蠕所逐西徙後令其子守此城因
號小月氏焉在波路西南後魏書云去代一萬六

千六百里其先或居西平張掖之間被服頗與羌同其俗以金銀爲貨隨畜牧移徙亦類北狄

党項

党項羌在古析支之地漢西羌之別種魏晉已降西羌微弱周滅宕昌鄧至之後党項始強南雜春桑迷桑等羌北連吐谷渾其種每姓別自爲部落一姓之中復分爲一小部落大者萬餘騎小者數千騎不相統一有細封氏費聽氏往利氏頗超氏野辭氏房當氏米禽氏拓拔氏而拓拔最爲強族唐貞觀五年詔遣使開其河曲地爲六十州內附者

三十萬口有羌酋拓拔赤辭者甚爲渾主伏允所
暱與之結婚屢抗官軍後與其從子孫頭並率服
與諸首領歸款列其地爲懿嵯麟可等三十二州
以松州爲都督府羈縻存撫之拜赤辭爲西戎州
都督賜姓李氏自是從河首積石山以來並無中
國之境後吐蕃強盛拓拔氏漸爲所逼遂請內徙
始移部落于慶州因置靜邊等州以處之故地陷
于吐蕃其處者爲其役吐蕃謂之藥弭又有黑党
項在赤水之西李靖之擊吐谷渾也渾主伏允奔
于黑党項居以空閑之地及吐谷渾舉國內屬其

黑党項首領號孰善王亦貢方物其雪山党項姓
破丑氏居雪山之下貞觀初亦嘗朝貢又有白狗
舂桑白蘭等諸羌自龍朔已後並爲吐蕃所破而
服屬焉其在西北邊者天授三年內附凡二十萬
口分其地置朝吳浮歸等一十一州仍散居靈夏
界內自至德已後常爲吐蕃所誘密以官告授之
以爲偵導故時或侵叛尋亦底寧至寶應初其首
領來朝助國共靈州軍食優詔褒美其在涇隴州
界者後上元元年率其眾十萬餘人詣鳳翔節度
崔光遠乞降寶應元年十二月歸順州部落乾封

州部落歸義州部落順化州部落和寧州部落和

義州部落保善州部落靈定州部落羅雲州部落

朝鳳州部落並詣山南西道都防禦使梁州刺史

臧希尙請州印希尙奏聞制旨允許之貞元三年

十二月初禁商賈以口馬器械于党項部領貿易

事十五年六州党項自石州奔過河西党項有六

府部落曰野利越詩野利龍而野利厥律兒黃野

罕等居慶州者號爲東山部落居夏州者號爲半

夏部落永泰大厓後居石州依水草至是永安城

鎮將阿史那思陳擾其部落求取馳馬無厭中使

又贊成其事党項不堪其弊遂率部落奔去過河
元和元年七月宰臣杜佑上疏曰伏見近者党項
與西戎潛通屢有降人指陳事跡而公卿廷議以
爲宜當謹甲兵備戎寇之侵軼益發士卒邀其寇
暴此蓋未達事機匹夫之常論耳蠻夷猾夏唐虞
已然周宣中興獫狁爲害但命南仲往城朔方驅
之太原及境而止誠不欲敝中國怒夷狄也秦平
六國恃其兵力北築長城以拒匈奴西逐諸羌出
于塞外勞力擾人結怨階亂中國烽烟未靜賊徒
蜂起海內雲擾實生謫戍漢武因文景之富命將

興師遂至戶口減半竟下哀痛之制罷田輪臺前
史尙嘉其先迷而後復蓋聖人之理天下也唯務
綏靖蒸人西至流沙東漸于海在南與北示在聲
教不以遠物爲珍不求遐方入貢豈疲內而事外
得少而失多故前代納忠之臣并有匡君之議淮
南王請息師于闐越賈捐之愿弃地于珠崖安危
利害高懸前史昔馮奉世矯漢帝之詔擊莎車傳
其王首于京城威振西域宣帝大悅議加爵土之
封蕭望之獨以爲矯制違命雖有功效不可爲法
恐後之奉使者爭功起兵爲國生事述理明白其

言遂行國朝自天后以來突厥默啜兵強氣盛屢
寇邊城爲患頗甚開元初邊將郝靈佺親捕斬之
傳首闕下自以爲功莫與二坐望寵爵宋璟爲相
慮武臣邀功爲國生事止授以郎將由是訖開元
中無人復議開邊中國遂寧外亦平靜此皆成敗
可徵鑒戒非遠且党項小蕃雜處中國本懷我德
當示撫綏頃者邊將非廉亟有侵刻或利其善馬
或取其子女賄其方物徵爲役徒嗟怨旣多叛亡
遂起或與北狄通使或與西戎寇邊有爲使然固
當徵革傳曰遠人不服則修文德以來之管子曰

國家毋使勇猛爲邊境此皆聖哲識微知著之遠
畧也今戎醜方強邊備未謹誠宜慎擇良將戒之
完輯使知誠信絕其求取用示懷柔來則懲禦去
則謹備自然彼懷我德革其奸謀何必遽圖興師
致生勞費陛下上聖仁慈育覆羣類動必師古謀
無不臧伏望堅保永圖置兵衽席則天下幸甚上
嘉獎之至九年五月復置宥州以護党項也十五
年七月鹽州送到劫烏白池鹽賊女子拓拔三娘
并婢二人召入內親詰之赦死送歸本處十一月
命太子中允李察爲宣撫党項使以部落繁富至

今遠近商賈賫雜綵諸貨入其部落貿易牛羊太和開成之際其蕃鎮統領無緒恣其貪恠音不顧危亡或強市羊馬者以是部落苦之遂相率爲盜靈鹽之路小梗會昌初上頻命使安撫之兼命憲臣爲使分三印以統之在邠寧鄜延者以侍御史內供奉官崔彥曾主之在鹽夏長澤者以侍御史內供奉李鄠主之在靈武麟勝者以侍御史內供奉鄭賀主之仍各賜緋魚袋以重其事久而無狀尋皆罷之

土俗物產

俗皆土著有棟宇織菴牛及羊毛覆之俗尙武無法令賦役其人多壽年至百五六十歲不事生產好爲竊盜常相陵劫尤重復仇仇人未得必鬻頭垢面跣足蔬食要斬讎人而後復常男女並衣裘褐被大氊不知耕稼土無五穀氣候多風寒以菴牛馬驢羊豕爲食五月草生八月霜雪降求大麥于他郡界醞以爲酒妻其庶母及伯叔母嫂子弟之婦淫穢蒸報諸夷中最爲甚然不婚同姓老死者以爲盡天年親戚不哭少死者則云天枉而悲哭之死則焚尸名爲火葬無文字但候草木以紀

歲時

白蘭國

白蘭國亦西羌之別種名後周時興馬東北接吐谷
渾西北至村模徙南界那鄂風俗物產與宕昌同
武帝保定元年朝獻使至

白狗國

白狗國亦西羌之別名與會州連接勝兵一千白蘭
羌亦西羌別種以上二國唐武德六年俱有使朝
貢貞觀五年十一月其渠帥並來朝貢永徽二年
十一月特浪生羌卜樓莫各率眾三萬人詣茂州

歸附三年正月生羌大首領凍就部落內附以其地置劍州顯慶中白蘭爲吐蕃所併收其兵以爲軍鋒開元二十九年益州長史章仇兼瓊奏其國及索等諸州寵官三十餘人出至奉川望準女國等例揀擇許令人奏餘並就奉川宴賜放回制曰可十月白狗國四品籠官蘇唐封及狗冉川五品籠官薩阿封等至各賜金紫玉帛以遣之貞元九年七月其王陁羅忽又與女國等詣劍南西川節度使韋臯內附詔授試太常卿兼保州司馬至今子孫承襲其爵

太平寰宇記卷之一百八十四終

太平寰宇記卷之一百八十五

四夷十四

西戎六

吐蕃

大羊同

悉立

章求拔

泥婆羅

軒渠

三童

澤散

驢分

堅昆

呼得

丁令

短人

波斯

吐蕃

吐蕃在吐谷渾西南不知有國之所由或云秃髮利

鹿孤子樊尼其王僞檀為乞伏熾磐所滅樊尼率

餘種依沮渠蒙遜其後子孫西魏時為臨松郡丞

今張掖郡張掖縣界與主簿皆得眾心因魏末中華擾亂招

撫羣羌日以强大遂改姓為罕蘇骨切勃野至今其

人號其主曰贊府貴臣曰主簿又或曰始祖贊普

自言天神所生號鶻堤悉補野因以為姓罕勃野與悉補

野言雖訛其實一也或云本姓棄蘇農其君長或在跋布川或居羅

婆川有小城而不居坐大壇帳名拂廬其下可容

數百人兵衛極嚴而牙府甚狹俗養牛羊取乳酪

供食兼取毛為褐而衣焉不食驢馬以麥為麵人

死殺牛馬以殉取牛馬積累于墓上其墓正方壘石爲之狀若平頭屋其臣與君自爲友號曰共命人其數不過五人君死之日共命人皆日夜縱酒葬日於腳下針血盡乃死便以殉葬又有親信人用刀當腦縫鋸亦將四尺木大如指刺兩腳下死者十有四五亦殉葬焉其設官父死子代絕嗣則近親襲焉非其種類輒不相伏其官章飾有五等一謂瑟瑟二謂金三謂金飾銀上四謂銀五謂熟銅各以方圓三寸褐上裝之安膊前以辨貴賤法令嚴肅兵器有弓刀楯稍甲冑每戰前隊皆死後

隊方進人馬皆披鐵子甲其製甚精周體皆徧惟
開兩眼非勁弓硬弩之所能傷也其戰不下馬列
行而陣死則遞收之終不肯退槍細而長於中國
者弓矢弱而甲堅人皆用劍不戰亦負劍而行其
驛以鐵箭爲契其箭長七寸若急驛膊前加著一
銀鶻有草名速古芒乘長二寸狀若斜蒿有鼠尾
長于常鼠國禁殺鼠殺鼠者加其罪有可跋海去
赤嶺百里方圓七十里東南流入蠻與西洱河合
流而東號漾濞水又東南出會川爲瀘水焉自赤
嶺至羅婆川絕無大樹木惟有楊柳人以爲資置

大論以統理國事無文字刻木結繩爲約徵兵用

金箭寇至舉燧與臣下一年小盟

用羊狗猴

三年一大

盟

用牛馬驢

以麥熟爲歲首其國都號爲羅婆城用法

嚴整議事則白下而起因人所利而行之此其所

以強且久也重壯賤老母拜於子重兵死惡病終

以累代戰沒者爲甲門臨陣奔北者懸狐尾于其

首表其似狐之怯其贊普弄贊雄霸西域隋開皇

中其主論贊索弄贊都牂柯西匹播城已五十年

矣國界西南與婆羅門接自大唐初已有勝兵數

千萬號爲強國党項白蘭諸部及吐谷渾西域諸

國咸畏懼之至其主奔蘇農贊唐貞觀十五年正月以宗室女封文成公主降于吐蕃贊普命禮部尚書江夏郡王道宗送之贊普親迎于河源見王人執子婿禮甚謹嘆大國服飾威儀之美俯仰有愧色謂所親曰我祖宗未有通婚大國者今我得尚大唐公主當築一城以誇後代仍遣酋豪子弟請入國學以習詩書高宗初封賓在公王蘇農死其子早卒以孫代立號乞梨拔布幼小大相祿東贊攝知國事總章中以兵臨吐谷渾吐谷渾告急咸亨中高宗令將軍薛仁貴郭待封等率眾十餘

萬伐之至大非川爲吐蕃大論欽陵所敗因遂滅吐谷渾欽陵姓薛氏其父祿東贊曉兵術吐蕃贊普以國事委之講兵訓師雅有節制吐蕃之兼并諸羌雄霸西土東贊有力焉有子五人及東贊死欽陵兄弟復專其國上元中寇鄯廓等州儀鳳三年遣工部尙書劉審理爲洮河軍總管率兵十八萬以討之戰于青海軍敗歿于陣調露二年中書令李敬玄戰于大非川又敗績遣黑齒常之襲擊破之武后如意初武威軍總管王孝傑大破吐蕃復龜茲于闐踈勒碎葉四鎮至萬歲通天初又寇

涼州執都督許欽明欽陵兄弟皆有才畧欽陵多
居中諸弟分鎮四方諸蕃憚之二年吐蕃大論欽
陵遣使請和武后遣前梓州通泉縣尉郭元振往
至野狐河與陵遇陵言曰大國久不許陵和陵久
不遣蕃使以久無報命故去秋有甘涼之抄斯實
陵罪今欲修好能無懼乎振乃謂曰論先考東贊
以宏才大畧服事先朝結好通親荷榮承寵本期
傳之永代垂之無窮論不纂守舊恩中致猜阻無
故自絕日尋干戈屢犯我河湟頻擾我邊鄙且父
通之子絕之豈爲孝乎父事之子叛之豈爲忠乎

然論之英聲藉甚遐外各自爲主奚爲懼乎陵曰
如所來言陵無憂矣今天恩旣許和好其兩國戍
守咸請罷置以便萬姓各守本境靡有交爭豈不
休哉然西十姓突厥四鎮諸國或時附蕃或時歸
漢斯皆多翻覆乞聖恩含弘拔去鎮守分離屬國
各建侯王使其國自君人自守旣不疑漢又不屬
蕃豈不人免憂虞荒陬幸甚振曰十姓四鎮本將
鎮靜戎落以撫寧西土通諸大邦非有他求論今
奚疑而有憂乎論曰使人此詞誠爲實論然緣邊
守將多好功名見利而動罕守誠信此蕃國所爲

深憂也振曰十姓諸部與論種類不同山川各異
曠覽古昔各自區分復爲我編人積有年歲今論
欲一言而分離數部得非昧弱苟利乎陵曰使人
豈不疑陵貪冒無厭謬陳利害窺竊諸部以爲漢
邊患耶陵雖識不逮遠請爲使人明之陵若愛漢
土地貪漢財幣則青海湟川實邇漢邊其去中州
蓋三四千里必有窺羨何不爭利于此中而突厥
諸鎮懸在萬里之外積漠廣莽殊異中土安有爭
地于萬里外而能爲漢邊患哉捨近務遠計豈然
也但中州人士深謀多計天下諸國皆爲漢并雖

大海之外窮塞之表靡不磨滅矣今吐蕃塊然獨
在者非漢不貪其土地不愛其臣僕陵兄弟小心
謹密保守之耳而十姓中五咄六諸部落僻近安
西是與吐蕃頗相遼遠俟斤諸部落密近蕃境其
所限者唯界一磧騎士騰突旬月卽可以蹂踐蕃
庭爲吐蕃之巨蠹者唯斯一隅且烏海黃河關源
阻深風土疫癘縱其有謀夫猛將亦不能爲蕃患
矣故陵無敢謬求西邊沙路坦達夷漫縱羸兵庸
將亦易以爲蕃患故陵有此請實非欲侵漁諸部
以生心于漢邊若陵有謀漢之懷有俟隙之意則

甘涼右地暨于磧石北道綿亙二千里其廣者不
過二三百里狹者纔百里陵若遣兵或出張掖或
出玉門使大國春不遑種秋無所獲五六歲中或
可斷漢右界矣又何爲棄所易而窺所難乎此足
明陵心矣往者高宗以劉審禮有青海之役乃使
黃仁素賈守義來和陵之上下將士咸無猜意故
邊守不戒嚴和事未畢則爲好功名人崔知辨從
五俟斤路乘我閒隙瘡痍我眾驅掠牛羊蓋以萬
計自此陵之國人危慄和事矣今之所求但懼好
功名者之吞噬冀此爲屏翰以虞之實非有他懷

焉振曰茲事漫汗體大非末吏所能明論當發使
奏章以聞取裁于聖主陵乃命郎中乞恩若爲使
振曰今遣使後國不可更犯漢邊且蕃使前後入
朝不時遣者良以使去之後兵仍犯漢故朝廷躊
躇曰是給我也以爲偵諜

給徒改切偵楮
敬切諜音疊

不以爲

使人遂遷延無報今若踵前犯塞是故陷使人孰
謂和也陵俛首踧踖久之曰陵與國人咸憾崔知
辨之前事故嘗有此舉以虞好功者之來侵此實
以選練騎士三萬分路出師使人既有此言今既
于和事非便安可相違卽罷兵散卒指天爲信斯

具之表矣振與恩若至時朝廷以四鎮十姓事欲
罷則有所顧欲拒則有所難沈吟久之莫能決振
以爲役夏奉夷竭內事外非計之得乃獻疏云臣
聞利或生害害亦生利國家奄有天下園囿八荒
而萬幾百揆之中至難消息者惟吐蕃與默啜耳
今吐蕃請和默啜受命是將大利于中國也若圖
之不審卽害亦隨之如防患有方則利亦隨之今
欽陵所論欲裂十姓地界抽去四鎮兵防此是欽
陵切論者若以爲可允則當明決斷之若以爲不
可則當設策以羈縻之終不可直拒絕以阻其意

使速興邊患也臣竊計此事關隴動靜之機豈可輕其舉措哉使彼旣和未絕則其惡亦不得頓生請借人事爲比設如人家遭盜賊一則攻其內室一則寇其外落主人必不先于外寇而憂在內室何則以內患近而外患遠也今國之外患者十姓四鎮是內患者甘涼瓜肅是復關隴之人久事屯戍向三十年臣料其力用久竭矣脫一朝甘涼有不虞此中豈堪廣調發也臣已病之不知朝廷以爲何如夫善爲國者當先料內以敵外不貪外以害內今議事者舍近患而靡郵務遠患而是貪芻

臣愚驚罔識厥策必以四鎮殷重事不可依何不

言事以答之如欽陵云四鎮諸部蕃界接俱漢密

近蘭今金城郡鄯西平郡此為漢患實在茲輩斯亦國家

之所要者今宜報欽陵云國家非恡四鎮本置此

以扼蕃國之尾分蕃國之力使不得并兵東侵今

若頓委此於蕃恐蕃強盛易為東擾必實無東侵

意則宜還漢吐谷渾諸部及青海故地即俟斤部

落當以與蕃如是足塞陵口而和事未絕也如後

小乖則曲在彼兼西邊諸國款附歲久論其情義

豈與吐蕃同日而言今未知其利害未審其情實

遂有分裂亦恐傷諸國之意非制馭之長筭待籌
損益知其利便續以有報如此則和亦未爲絕更
使彼蕃懸情上國是亦誘撫之方復願省擇使無
遺算以惠百姓也其後贊普年長忌欽陵乃與首
領論巖等密圖之言將獵召兵執欽陵等親黨二
千餘人殺之自帥眾討之欽陵自殺其親信左右
同日自殺者百餘人其弟贊婆先在東境率千餘
人來降授右衛大將軍乞梨拔布神龍初死其子
立乞梨弩悉龍時年七歲祖母祿沒氏攝位至神
龍三年四月詔以所養嗣雍王守禮女金城公主

出降吐蕃贊普景龍四年正月幸始平縣送金城
公主改始平縣為金城縣又改其地為鳳臺鄉愴
別里至開元二年吐蕃遣使請盟至七月又侵蘭
渭玄宗下制親征會薛納破賊于武階驛二十一
年金城公主請樹碑于赤嶺定漢蕃界詔張守珪
與其使莽布支同訖其事二十九年金城公主薨
遣使告哀乞和不許至德二年復遣使請和且助
國家討逆詔遣南巨川報之大麻十三年寇我靈
州奪御史渠以弊屯田建中元年入蕃使太常卿
韋倫至自大麻已來吐蕃陷我河隴諸州聘使前

後數輩皆畱之及德宗登位以德懷遠其俘囚五百人各給衣一襲使倫押還其國與之約和仍勅邊將無令侵伐吐蕃始聞歸其人不之信及蕃俘囚入境部落畏威懷惠尋又命復使蕃中至十二月倫至自蕃中與其宰相論欽思明等來朝吐蕃見倫再至甚敬請就館獻聲樂以娛之畱九日而遣倫一歲再往絕域戎夷奉教無此之速也三年殿中少監崔漢衡與蕃使至乃約靈州以賀蘭涇州以彈箏峽西口隴州以清水爲漢界至四年詔隴右節度使張鎰與吐蕃盟於清水夏四月沒蕃

將士僧尼等至自沙州凡八百人報元年之德也
貞元元年鳳翔節度使李晟遣兵襲吐蕃之後摧
沙堡大破之斬首領扈屈律悉蒙等七人傳首京
師結贊大懼累遣使請和尋方許之至二年吐蕃
遊騎至於好時其月又寇鳳翔一夕而退十一月
陷我鹽夏二州三年吐蕃背盟平涼城八年山南
節度使嚴震奏破吐蕃於芳州及黑水堡十年四
川節度韋臯奏西山峨和城破蕃賊三萬十三年
贊普遣使求和帝以其豺狼之性數負約不受表
任還十七年陷麟州大掠居人次鹽州西九十里

橫曹峰頓軍有蕃卒傳呼麟州僧延素等七人稱
徐舍人召其火隊沒勒支遽引延素等疾趨至帳
前皆馬革楛手毛繩鎖頸見一年少身長六尺餘
赤髭大目乃徐舍人也命解縛坐帳中曰師勿懼
余本漢司空英公五代孫也當武后斲喪王室子
高祖建義中泯子孫流播絕域今五代矣雖代居
戎職位掌兵要思本之心未嘗少忘無由自拔耳
此蕃漢交境也復九十里至安樂州師無由歸東
矣又曰子奉命率師備邊因求資食遂入漢疆輾
轉東進至麟州城下旣無備禦援兵又絕是以拔

之適有飛馬使至猶中國驛騎也云術者上變召
軍急還遂解縛歸之元和二年春遣使來還沒蕃
人鄭叔矩路泌之柩及叔矩男武延等一十三人
十三年圍宥州十四年寇鹽慶二州長慶元年帝
命宰臣崔植等與吐蕃使盟于都城西三會寺二
年入蕃使盟于悶恆盧川是川蓋贊普之夏衙也
中有臧河流焉四年吐蕃遣使乞五臺山圖自寶
麻元年至會昌朝貢不絕大中三年春秦原安樂
等三州并石門木峽等七關款塞涇原節度使康
季榮以狀聞自是三州復爲內地

四至

其國當長安西八千里去鄯善五百里過烏海入吐谷渾部落彌多彌蘇毗及白蘭等國至吐蕃界西與婆羅門接

土俗物產

其國風雨雷雹每隔日有之盛夏節氣如中國暮春之月山有積雪地有瘴氣令人氣急不甚爲害其俗重漢緡而貴瑟瑟男女用爲首飾男女皆辮髮瓊爲裘頰塗面無器物以手捧酒而飲之屈木令圓以皮作底就中而食俗多金及小馬 大昌

步山 可跋海

去赤嶺百里方圓七十里東南流入蠻界西洱河合流而東號爲漾

滇水又東南出會州爲瀘水焉自赤嶺至羅婆川絕無樹木惟有楊柳人以爲資信也

大羊同國

大羊同國東接吐蕃西接小羊同北至于闐東西千

餘里勝兵八九萬其人辮髮氍裘畜牧爲產業地

多風雪冰厚丈餘物產頗同吐蕃俗無文字但刻

木結繩而已刑法嚴峻其酋豪死抉

于穴切

去其腦

實以珠玉剖其五臟易以黃金假造金鼻銀齒以

人爲殉卜以吉辰藏諸巖穴他人莫知其所多殺

勃牛草馬以充祭祀葬畢服除其王姓姜葛有四

大臣分掌國事自古未通中國唐貞觀十五年遣使來貢貞觀末爲吐蕃所滅分其部眾散置隙地

悉立國

悉立國在吐蕃西南戶五萬有城邑村落依溪澗丈夫以緇綵纏頭衣氍毹婦人辮髮著短裙以蒸報爲俗婚姻簡畧不行財貺畜多水牛殺羊雞豕穀宜秔稻麥豆饒甘蔗諸果死于中野不爲封樹喪制以黑衣爲服一年就吉刑有別劓羈事吐蕃自古未通中國唐貞觀二十年遣使貢方物

章求拔國

章求拔國或云章揭拔本西羌種也在悉立西南居
四山之內近代移出山西接通東天竺遂改衣服
變西羌之俗因而附焉其地延袤八百里勝兵二
千餘人居無城郭好爲寇掠商旅患之貞觀二十
年聞悉立入朝亦遣使朝貢

泥婆羅國

泥婆羅國在吐蕃西其俗翦髮與眉齊穿耳插音竹
筩緩至肩者以爲姣麗食用手其器皆銅多商賈
少田作以銅爲錢面文爲人背文爲馬其牛鼻不
穿孔衣服以一幅布蔽身數日一盥浴以板爲屋

壁皆雕畫俗重博戲頗解推測盈虛兼通麻術事
五天神鑄石爲像每日清水浴神烹羊而祭其王
那陵提婆身著眞珠諸寶耳垂金鈎玉璫佩寶裝
伏突坐獅子座常散花燃香大臣及左右並坐于
地有阿耨安彌池周迴二十餘步以物投之卽生
烟焰懸釜而炊須臾而熟唐永徽二年王尸利那
連陀羅遣使朝貢

軒渠國

軒渠國其國多九色鳥青口綠頭紫翼紅膺紺頂丹
足碧身細背玄尾亦名九尾鳥亦名錦鳳其青多

太平寰宇記 卷之一百八十五 古
紅少謂之繡鸞恆從弱水西來或云是西王母之
禽也國多幣貨同三童國

三童國

三童國在軒渠國西南千里人眼皆有二睛珠或有
四舌者皆爲一種聲亦能俱語常貨多用焦越犀
象作金幣率效國王之面亦效王后之面若丈夫
交易則用國王面錢死則更易

澤散國

澤散國魏時聞焉屬大秦其理在海中央北至驢分
水行半歲風疾一月到最與安息國安國城相近

西南詣大秦都不知里數

驢分國

驢分國魏時聞焉屬大秦渡海飛橋長二百三十里
渡海道西南行繞海直西行至焉

堅昆國

堅昆國魏時聞焉在康居西北勝兵三萬人隨水草
畜牧多貂有好馬

呼得國

呼得國魏時聞焉在蔥嶺北烏孫西北康居東北勝
兵萬餘人隨畜牧出好馬亦有名貂

丁令國

丁令國魏時聞焉在康居北勝兵六萬人隨畜牧出名鼠皮白昆子青昆子皮此上三國堅昆中央俱去匈奴單于庭安習水七千里南去車師國五千里西南去康居界三千里西去康居王理八千里或以爲此丁令卽匈奴北丁令也而北丁令在烏孫西似其種別也又匈奴北有屈射國有隔昆國有新黎國明北海之南自復有丁令國非此烏孫之西丁令也烏孫長老言北丁令有馬脰國其人音聲似雁鶩從膝以上身頭人也膝已下生毛馬

脛馬蹄而走疾于馬勇健敢戰

短人國

短人國魏時聞焉在康居西北男女皆長三尺人眾甚多去奄蔡諸國甚遠康居長老傳聞嘗有商旅行北方迷惑失道而到斯國中甚多真珠夜光明月珠見者不知名此國號以意商度去康居可萬餘里突厥本末記云突厥北馬行一月有短人國長者不踰三尺亦有二尺者頭少毛髮若羊胞之狀突厥呼為羊胞頭國其旁無他種類相侵俗無寇盜但有大鳥高七八尺恆向短人啄而食之短人皆持弓矢以為之備按此亦在西北即魏畧短人國者是也

波斯國

波斯國後魏通焉在達曷水之西都宿利城

後周史云蘇利

城隋史云蘇蘭城記錄音訛其實一也

有河經其城中南流卽條支

之故地也大月氏之別種其先有婆波斯匿王其子孫以王父字爲氏因爲國號焉王姓波斯戶十餘萬國有樓觀屋宇佛寺城西十五里有土山周迴高大其勢連接甚遠中有鷲鳥啖羊吞人極以爲患王坐金床冠金花冠衣錦袍織成帔飾以眞珠寶物其俗丈夫剪髮戴白皮帽貫頭衫兩廂近下開之亦有帔巾緣以織成婦人服大衫披大帔其髮前爲髻後披之飾以金銀花仍貫五色珠絡

之于膊其王卽位以後擇諸子內賢者密書其名
封之于庫諸子及大臣皆莫之知也王死眾乃共
發書視之其封內有名者卽爲王以其餘子各出
就邊任兄弟更不相見也國人謂王曰醫噴

才割切

妃曰防步率王之諸子曰殺野其刑法最酷重罪
繫高竿射而殺之次則繫獄值新王立乃釋之孝
明帝時及西魏末貢方物突厥不能服其國亦羈
縻領之隋大業中亦遣使來朝唐貞觀二十一年
其國獻偃蛇形類鼠而色青身長八九寸能入穴
取鼠不畏人龍朔元年其國王卑路斯奏云頻被

大食侵擾請兵救援其時詔遣隴州南由縣令王名遠充使西域分置州縣因列其地疾陵城爲波斯都督府授卑路斯爲都督自後屢遣使朝貢咸亨中卑路斯自來朝貢高宗厚加恩異授右武衛將軍至儀鳳三年令吏部侍郎裴行儉將兵冊送卑路斯還波斯國行儉以其路遠至安西碎葉而還卑路斯獨返不得入其國漸爲大食所侵客于吐火羅二十餘年有部落數千人後漸離散至景龍二年來朝拜爲左威武將軍無何病卒其國遂滅而部曲存自開元七年至天寶六載凡十遣使

來朝貢夏四月遣使貢瑪瑙床又至九載四月貢
火毛繡舞筵長毛繡舞筵無孔眞珠至大厯六年
九月再遣使來朝貢方物及大顆眞珠等物

四至

東去長安一萬五千三百里西去海數百里東南
去穆國四千餘里西北去拂菻四千五百里後魏
書西域傳云波斯在忸密西

土俗物產

賦稅準地輸銀錢俗事天地日月水火諸神西域
諸胡事火祆者皆詣波斯受法婚合不擇尊卑于

諸夷中最爲醜穢死者多弃于山一月埋城外有人別居惟知喪葬之事號爲不淨人若入城市搖鈴自別以六月爲歲首氣候暑熱家自藏冰其地多砂磧引水漑灌其五穀及禽獸與中夏畧同惟無稻及黍土出名馬駿駝日行七百里富室至千餘頭者又多駿犬今所謂波斯犬也出麟及大驢白象獅子有大鳥形如橐駝有兩翼飛而不能高食草與肉噉火又有大鳥卵眞珠瑪瑙玻璃珊瑚琉璃水晶瑟瑟金銀鋤石金剛火齊銅錫鑛鐵硃砂水銀綾錦疊細布氍毹毼毼毼毼越諾布金縷

織成赤罽皮薰陸鬱金蘇合青木等香胡椒萆撥
石蜜千年棗香附子訶黎勒無食子鹽綠雌黃又
有優鉢曇花鮮華可愛地有鹹池人代鹽味 褐
婆竭城 褐渾城 勿遠山 達曷河 竭離別

關在國東北四
千六百里

太平寰宇記卷之一百八十五終

太平寰宇記卷之二百八十五 嶺南道 韶州府 曲江縣

曲江縣 在韶州府之南 距府城一百八十里 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

縣城在曲江 縣城在曲江 縣城在曲江 縣城在曲江

太平寰宇記卷之一百八十六

四夷十五

西戎七

悅般

伏盧尼

朱俱波

渴槃陁

粟弋

阿鈎羌

副貨

疊伏羅

賒彌

石國

瑟匿

女國

吐火羅

俱蘭

劫國

阿羅伊羅

越底延

大食

悅般國

悅般國後魏時通焉在烏孫西北乃匈奴北單于之
部落也昔爲漢車騎將軍竇憲所逐北單于度金
微山西走康居其羸弱不能去者住龜茲北地方
數千里眾可二十餘萬涼州人猶謂之單于王太
武眞君九年遣使朝獻送幻人稱能割人喉脈令
斷擊人頭令骨陷皆出血淋漓或數升或盈斗以
草藥納其口中令嚙咽之須臾血止養瘡一月復
常又無癍痕太武乃出死罪囚試之皆驗云中國
諸名山皆有此草乃使人受其術而厚遇之

土俗物產

其風俗與高車同其人清潔或倣胡俗翦髮齊眉
以鈿音題塗之甚光澤日三澡漱然後飲食其國
南界有火山山旁石皆焦鎔流地數十里乃凝堅
人取以爲藥卽石硫黃也

伏盧尼國

伏盧尼國後魏通焉理伏盧尼城在波斯國西北有
大河南流中有鳥其形似人亦有似橐駝馬者皆
有翼嘗居水中出水便死城北有云尼山出銀珊瑚
琥珀

朱俱波國

太平寰宇記 卷之一百八十一
朱俱波國後魏時通焉在蔥嶺北二百里亦名朱居
槃漢子合國也今并有漢西夜蒲犁依耐得若四
國之地其王本踈勒國人宣武永平中朱居槃國
遣使來朝貢唐武德以後亦頻遣使朝貢

四至

去瓜州三千八百里在于闐國西千餘里其西至
渴槃陁國南至女國三千里北至踈勒九百里

土俗物產

其俗崇飾佛法其人言語與于闐相似其閒小異
人貌多同華夏亦類踈勒文字同于婆羅門

渴槃陁國

渴槃陁國後魏時通焉亦名渴羅陀國理蔥嶺中近
朱俱波國其王本踈勒人累代相承以居此國有
戶二千餘國法殺人劫賊者死餘徵罰其稅雜輸
之服飾婚姻同踈勒王坐金床死者埋殯七日爲
孝太武帝太延三年朝貢于後不絕

四至

西至護蜜國南至懸度山無定界北至踈勒國界
西北至判汗國

土俗物產

衣服人貌語音與于闐相似書與婆羅門同國中
 咸事佛人山居勁健雜人多而胡少有音樂兵器
 婚姻同踈勒 懸度山在國西南四百里懸度者
 石山也溪谷不通以繩索相引而度其間四百里
 中往往有棧道因以為名今按懸度與葱嶺迤邐
 相屬郵置所絕道阻且長故行人由之莫能分別
 然法顯宋雲所經即懸度山也 頭痛山在國西
 南向罽賓路歷大頭痛小頭痛之山赤土身熱之
 阪宋膺異物志云大頭痛小頭痛山皆在渠搜之
 東踈勒之西經之者身熱頭痛夏不可行行則致

死惟冬可行尙嘔吐山有毒藥氣之所爲也冬乃
枯竭故可行也其蔥嶺俗號疑極山今按蔥嶺回
環其國 不可依山 蒲昌海 賀蘭山

粟弋國

粟弋國後魏通焉在蔥嶺之西一名粟特一名特拘
夢出好馬牛羊葡萄諸果葡萄酒極美于諸國蓋
水味美故也出大禾高丈餘子如胡豆在安西北
五千里附庸小國四百餘城太武帝時遣使朝貢
魏書西域傳云粟特一名溫那沙古之奄蔡國按
弋一國也十三州志奄蔡粟特各有君長而魏收

以爲一國謬也

阿鈎羌國

阿鈎羌國後魏通焉在莎車西南去代一萬三千里
國西有懸度山其閒四百里往往有棧道下臨不
測之淵人行以繩索相持而度有五穀諸果市用
錢爲貨居止立室有兵器

副貨國

副貨國後魏通焉去代一萬七千里東去河富使且
國西至沒誰國中閒相去千里南有連山不知名
北至奇沙國相去一千五百里宜五穀葡萄惟有

馬駝騾國王有黃金殿殿上有金駝七頭各高三尺孝文時其王遣使朝貢

疊伏羅國

疊伏羅國後魏通焉去代三萬一千里國中有勿悉城北有鹽奇水西流有白象土宜五穀宣武時遣使貢方物

賒彌國

賒彌國後魏時聞焉在波斯之南山居不崇佛法專事諸神宋雲行記云語音諸國同不解書筭不知陰陽國人翦髮婦人爲團髮亦附嚙嗟東有鉢盧

勒國路險緣鐵鎖而度下不見底後魏時遣宋雲等使于彼不達

石國

石國隋時通焉居于藥殺水都柘折城方十餘里本漢大宛北鄙之地王姓石名涅國城之東南立屋置座于中正月六日七月十五日以王父母燒餘之骨金甕盛之置牀上巡繞而行散以香花雜果王率臣下設祭焉禮終王與夫人出就別帳臣下以次列坐而饗宴有粟麥多良馬隋大業五年及唐貞觀八年竝遣使朝貢顯慶三年列其地瞰羯

城爲大宛都督府仍以其王噉吐屯攝舍提于屈
昭穆爲都督開元初其蕃王莫賀咄吐屯有功封
石國王加特進尋又冊爲順義王二十九年其王
伊捺吐屯屈勒上表曰奴身千代已來忠赤于國
只如突騎施可汗赤忠之日部落安貼後背天可
汗腳底火起今突厥屬天可汗在于西頭爲患惟
有大食莫踰突厥伏乞天恩不棄突厥部落打破
大食諸國自然安貼天寶初累遣使朝貢至五年
封其王子那俱車鼻施爲懷化王并賜鐵券九年
安西節度使高仙芝奏其王蕃禮有虧請討除之

其王納降于仙芝乃遣使送去開遠門數十里負
約以王為俘囚獻于闕下斬之自後西域背怨仙
芝所擒王之子西走大食引其兵至怛邏斯城仙
芝軍大為所敗自是西附于大食國至寶應二年
及大曆七年竝遣使來朝貢又杜環經行記云其
國城一名赭支一名大宛國中有二水一名珍珠
河一名質河竝西北流土地平敞多果實出好犬
良馬又云碎葉國從安西西北千餘里敦達嶺嶺
南是大唐北界嶺北是突厥騎施南界西南至蔥
嶺二千餘里其水嶺南流者盡過中國而歸東海

嶺北流者盡經胡境而入北海又北行數日度雪
海其海在山中春夏常雨雪故曰雪海中有細道
道傍往往有水孔嵌空萬仞輒墮者莫知所在敦
達嶺北行千餘里至碎葉川其川東頭有熱海茲
地寒而不凍故曰熱海又有碎葉城天寶七年北
庭節度使王正見薄伐至此城壁摧毀邑居零落
昔交河公主居止之處今建大雲寺猶存其川西
接石國約長千餘里川中有異姓部落有異姓突
厥各有兵馬數萬城堡閒雜日尋干戈凡是農人
皆擐甲冑專相虜掠以爲奴婢其川西頭有城名

曰怛邏斯石國大鎮即天寶十年高仙芝之軍所敗之地

四至

東與北至西突厥界西至波臘國界西南至康居界南至率都沙那國界南去鏤音撥汗六百里東南去瓜州六千里當長安西北一萬四百一十里

土俗物產

從此至西海已來自三月至九月天無雲雨皆以雪水種田宜粟大小麥稻禾諸豆等物多良馬飲葡萄酒糜酒腊乳等物 伊羅山 藥殺水在國

界

瑟匿國

瑟匿國北接石國其俗不好商賈風俗畧與康國同
唐貞觀二十年朝貢使與役槃使同至役槃與康
國隣出好馬

女國

女國隋時通焉在蔥嶺之南其國代以女爲王王姓
蘇毗女王之夫號爲金聚不知政事國內丈夫惟
以征伐爲事山上爲城方五六里人有萬家王居
九層之樓侍女數百人五日一聽朝復有小女王

太平寰宇記 卷之一百八十六
共理國政亦數與天竺及党項戰爭其女王死國中貴人剝取皮以金屑和骨肉置諸瓶內埋之經年又以其皮內于鐵器埋之開皇中遣使朝貢唐貞觀八年朝貢使至

四至

段國沙州記云白蘭西南二千五百里隔大嶺又渡三十里海卽此女國也

土俗物產

其俗貴婦人輕丈夫而性不妬忌男女皆以彩色塗面一日之內或數遍更之男子皆披髮婦人或

辮髮而縈之王死若無女嗣位國人乃調歛金錢
得數百萬還以死王之族買女而立之其地五男
三女貴女子賤丈夫婦人爲吏職男子爲軍士女
子貴者則多有侍男男不得有侍女雖賤庶之女
盡爲家長有數夫焉生子皆從母姓氣候多寒以
射獵爲業出鋤音偷石朱砂麝香犛音黎牛駿馬蜀馬
尤多鹽恆將向天竺國興販俗事阿修羅神

吐火羅國

吐火羅國一名土壑宜後魏時吐呼羅國也隋時通
焉都蔥嶺西數百里在烏滸河南卽媯水也勝兵

太平寰宇記 卷之一百八十六
十萬皆善戰大業中遣使朝貢唐初屬西突厥高宗永徽元年遣使獻大鳥高七尺其色玄足如駝鼓翅而行日三百里能噉鐵夷俗謂爲駝鳥三年其葉護那史烏濕波奉表告立高宗遣置州縣使王名遠到其國以所理阿緩大城爲月氏都督府各分其小城爲二十四州以烏濕波爲都督王名遠請于吐火羅國立碑以紀聖德帝從之五年烏濕波遣子伊室達官弩朝貢龍朔元年授烏濕波使持節月氏等二十五州諸軍事月氏都督麟德二年遣其弟祖訖多貢瑪瑙燈兩具高三尺餘開

元七年其葉護支汗那帝賒上表獻天文人大慕
闇請加試驗八年貢名馬及驃十二年貢異藥乾
陀婆羅等二百餘品十七年冊其首領骨吐祿頓
度爲葉護葉護遣使貢須那伽帝釋麥二十六年
遣使貢紅玻璃碧玻璃生瑪瑙生金精及質汗等
藥天寶八年其葉護失理怵伽羅遣使上表云臣
鄰境有一胡號曰羯師居在淡山恃其道險遠違
背聖化親附吐蕃于國內置吐蕃城捉敦律要路
與吐蕃擬將兵入臣境臣每憂懼思破兇黨乞請
安西兵馬來載五月到小勃律六月到大勃律伏

大平寰宇記卷之一百八十六
乞允臣所奏事若不成請斬臣爲七截緣失密王
向漢忠赤特望勅書宣慰玄宗覽表許之十二年
遣使來朝貢乾元元年七月與西域九國遣兵助
國討逆肅宗令赴朔方行營

四至

在烏滸河南卽媯水也其北界漢時大宛之地南
去曹國一千七百里東去瓜州六千七百里

土俗物產

其人與挹怛羅雜居俗事佛多男子少婦人故兄
弟通室婦人五夫則首飾戴五角十夫戴十角男

子無兄弟則與他人結爲昆季方始得妻不然則
終身無婦矣生子屬長兄衣服文字與子闐畧同
城北有玻璃山南崖穴中有神馬國人每牧牝馬
其側時產名駒皆汗血焉事與大宛同 藍氏城

故大夏國都也史記大宛傳大夏在鳩水南其都
曰藍氏城 薄提城今名薄底延城在國北後魏
書西域傳吐呼羅國有薄提城周圍六十里與西
蕃記薄提城可十四五里小異也 黠戛城 酌

汗建城 蔥淪嘴城 數嘴城 章昂城 波論
山今名屋數頗利山南崖石壁有一穴恆有馬尿

流出至七月旦石開馬自出關頭飲水土人因取
草馬放牧多生汗血馬日行千里忽遠山亦連互

俱蘭國

俱蘭國一名俱羅拏國與吐火羅接南抵雪山地險
迳物產唯出金精貞觀二十年朝貢使至

劫國

劫國隋時聞焉在蔥嶺中有戶數萬

四至

西與南俱與賒彌國界西北至挹怛國去長安一
萬二千里

土俗物產

氣候多熱有稻麥粟豆羊馬出洛沙青黛婚姻同
突厥土俗與嚙嚙同人面似山羌無尊卑之禮死
亾棄于山唐武德二年遣使貢寶帶金鎖甲玻璃
水精盃各一玻璃四百九十枚大者如棗小者如
酸棗

阿羅伊羅國

阿羅伊羅國隋時聞焉在烏茶國北大雪山坡上緣
梯登山接七百梯方到其國

越底延國

越底延國隋時聞焉理辛頭河北其王婆羅門種類
戶數萬有弓矢刀稍皮甲國法不殺人重罪流輕
罪杖國無課稅其俗事佛書同婆羅門王及庶人
翦髮衣錦袍不開縫貧者衣白氎婦人爲髻衣裙
衫帔長巾焉

四至

南接婆羅門國三千里西北至賒彌國千餘里東
北至瓜州五千四百里

土俗物產

俗清潔氣候暖多稻有羊馬多牛出鎡石訶黎勒

石蜜音京皮細氎等物

大食國

大食國唐永徽中遣使朝貢云其國在波斯之西或云隋大業中有波斯胡人度怛曷水若有神助得刀殺人劫奪商旅其眾漸盛因招附諸胡有胡人十一來據次第摩首受化為王此後眾漸歸附遂割波斯西境自立為王姓大食氏名繖虎檻切蜜莫末膩又破拂赫音廩及婆羅門城所當無敵兵眾有四十二萬有國已四十四年初王已死次傳第一摩首者今王即是第三又云前王常遣人乘船將

大食國唐永徽中遣使朝貢云其國在波斯之西或云隋大業中有波斯胡人度怛曷水若有神助得刀殺人劫奪商旅其眾漸盛因招附諸胡有胡人十一來據次第摩首受化為王此後眾漸歸附遂割波斯西境自立為王姓大食氏名繖虎檻切蜜莫末膩又破拂赫音廩及婆羅門城所當無敵兵眾有四十二萬有國已四十四年初王已死次傳第一摩首者今王即是第三又云前王常遣人乘船將

衣糧入海經涉八年未及西岸于海中見一方石
石上有樹枝赤葉青樹上總生小兒長六七寸見
人不語而笑皆能動其手腳頭着樹枝人摘取入
手卽黑乾其使得一枝今還在大食王處長安中
使至貢良馬開元初遣使來朝進良馬寶鈿帶其
使謁見平立不拜云本國惟拜天神雖見王亦不
拜所司屢詰責之其使遂依漢法致拜今康國石
國皆臣屬之開元十三年遣使蘇黎滿等來朝貢
授果毅賜緋袍銀帶又按賈耽四夷述云開皇中
大食族中有孤列種代爲酋長孤列種中又有兩

姓一號盆尼奚淡一號盆奚末換其奚淡後有磨

訶末者勇悍多智眾立為王東西征伐開地三千

里兼克夏臘一名鈇所監切城磨訶末後十四代至

末換殺其兄伊疾而自立性復殘忍其下怨之有

呼羅柵木龐人立波悉林舉義兵應者悉令著阜

旬月眾盈數萬鼓行而西生擒末換殺之遂求得

奚淡種阿婆羅拔立之自末換以前謂之白衣大

食自阿婆羅拔後改為黑衣大食阿婆羅拔卒立

其弟阿蒲恭拂至德初遣使朝貢代宗立為元帥

亦用其國兵收兩都寶應初其使又至恭拂卒子

太平寰宇記 卷之一百八十六
迷地立迷地卒子牟棲立牟棲卒弟訶論立貞元
初與吐蕃爲勅敵蕃兵大半西禦大食故鮮爲邊
患其力不足也至十四年九月以黑衣大食使舍
嵯烏雞沙北三人竝爲中郎將還蕃

四至

其境東西萬里與突騎施相接

土俗物產

其俗男夫鼻大而長瘦黑多鬚似婆羅門女人端
麗亦有文學與波斯不同出駝馬驢騾殺羊等土
多沙石不堪耕種無五穀惟食駝象等肉擊破波

斯拂赫始有米麵俗敬事天神按杜環經行記云
一名亞俱羅其大食王號墓門都此處其士女瓌
偉長大衣裳鮮潔容止閑麗女子出門必擁蔽其
面無問貴賤一日五時禮天食肉作齋以殺生爲
功德繫銀帶佩銀刀斷飲酒禁音樂人相爭者不
致擊毆又有禮堂容數萬人每七日王出禮拜登
高座爲眾說法曰人生甚難天道不易姦非劫竊
細行謾語安已危人欺貧虐賤有一于此罪莫大
焉凡有征戰爲敵所戮不得生天殺其敵人獲福
無量率土胥化從之如流法惟從寬葬惟從儉郭

郭之內音塵閨之中天地所生無物不有四方輻

輳萬物豐賤錦繡朱貝滿于市肆駝馬驢騾充于

街巷刻石蜜爲廬舍有似中國寶輦每至節日將

獻貴人琉璃器皿鍮石瓶鉢蓋不可筭數粳米白

飯不異中華其果有編桃人千年棗蔓菁根大如

斗而圓味美甚餘菜亦與諸國同葡萄大者如雞

子香油貴者有二一名耶寒漫一名沒回師香草

貴者有二一名查寒萃一名藜蘆菱綾絹機杼金

銀匠畫匠漢匠起作畫者京兆人樊淑劉泚機絡

者河東人樂還呂禮又以橐駝駕車有馬俗云西

海濱龍與馬相交所產也腹肚小腳腕長善者日馳千里又有馳小而鬃背有孤峯良者日馳千里又有馳鳥高四尺以上腳似馳蹄頸項勝得人騎行五六里其卵大如二升又有薺如檳如夏棗堪作油食除瘴氣其氣候溫土地無冰雪人多瘡痢一年之內十中五死今吞滅四五十國皆爲所役屬多分其兵鎮守其境盡于西海焉又云末祿國在亞梅國西南七百餘里胡姓末者茲土人也其城方十五里用鐵爲城門城中有鹽池又有兩所佛寺其境東西一百四十里南北一百八十里邨

大平寰宇記 卷之一百八十一 六
柵連接樹木交映四面合匝總是流沙南有大河
流入其境其土沃饒其人清潔牆屋高厚市廛平
正木旣雕刻土亦繪畫又有細軟疊布羔羊皮裘
估其上者值銀錢數百果有紅桃白棕遏白黃李
瓜大者名尋枝十餘人食一顆輒足越瓜長四尺
以上菜有蔓菁蘿蔔長蔥顆蔥芸薹胡芹葛藍軍
蓬苧香瓠蘆等尤多葡萄又有黃牛野馬水鴨石
雞其俗以五月爲歲每歲以畫缸相獻有打球節
鞦韆節其大食東道使鎮于此自此至西海以來
大食波斯參居雜止其俗禮天不食自死肉及宿

肉以香油塗髮又云若國在大食西界周迴數千里造屋兼瓦疊石爲壁米穀殊賤有大川東流入亞俱羅商客糴此糴彼而往來相繼人多魁梧衣裳寬大有似儒服其若國有節度五有兵馬一萬以上北接可薩突厥可薩北又有突厥足似牛蹄好噉人肉

太平寰宇記卷之一百八十六終